



## WORD

### WHAT

*What does the Bible say?*

<sup>1</sup>Ipinanganak si Jesus sa bayan ng Betlehem sa lalawigan ng Judea noong si Herodes ang hari. Isang araw, dumating sa Jerusalem ang ilang taong dalubhasa galing sa silangan. <sup>2</sup>Nagtanong sila, “Saan ba ipinanganak ang hari ng mga Judio?” Nakita namin ang kanyang bituin sa silangan, at naparito kami upang sambahin siya.” . . . <sup>9,10</sup>Pagkatapos nilang marinig ang bilin ng hari, umalis na sila. Habang naglalakbay sila, muling lumitaw ang bituin na nakita nila sa silangan, at labis silang natuwa. Nanguna sa kanila ang bituin hanggang makarating sila sa kinaroroonan ng sanggol. <sup>11</sup>Pagpasok nila sa bahay, nakita nila ang sanggol at ang ina nitong si Maria. Lumuhod sila at sumamba sa sanggol. Inilabas din nila at inihandog sa sanggol ang mga dala nilang ginto, insenso at pabangong mira.

Mateo 2:1,2,9-11

Hinintay at inabangan ng mga dalubhasang galing sa silangan ang kapanganakan ng tunay na Hari ng mga Judio. Narinig nila ang tungkol kay Jesus sa mga propeta noon at nang nakakita sila ng mga pamilyar na palatandaan, agaran silang naglakbay upang makita ng personal ang Mesiyas. Ang naging tugon nila sa Magandang Balita ay nagbibigay sa atin ng magandang halimbawa ng kung paano maging isang tunay na sumasamba sa Diyos. Paano ba tumugon ang mga dalubhasa sa pagdating ni Jesus?

- **Pumunta sila upang sambahin si Jesus.**

. . . “Saan ba ipinanganak ang hari ng mga Judio?” Nakita namin ang kanyang bituin sa silangan, at naparito kami upang sambahin siya.”

Mateo 2:2

Siguro’y naging puspusan ang paghahanda ng mga dalubhasang nanggaling pa sa malayong lugar upang makita lamang si Jesus. Desidido na sila sa kanilang gagawin: ang sambahin si Jesus pag nakita nila ito. Tulad nito, kailangan din nating magdesisyong sambahin si Jesus kahit ano pa man ang ating pinagdadaanan dahil karapat-dapat Siyang purihin. Anu-anong mga bagay ang nagpapahirap sa iyong sambahin si Jesus?

- **Sinunod nila ang Salita ng Diyos.**

<sup>9,10</sup>Pagkatapos nilang marinig ang bilin ng hari, umalis na sila. Habang naglalakbay sila, muling lumitaw ang bituin na nakita nila sa silangan, at labis silang natuwa. Nanguna sa kanila ang bituin hanggang makarating sila sa kinaroroonan ng sanggol.

Mateo 2:9,10

Noong una, ang bituin ang naging gabay ng mga dalubhasa patungong Jerusalem. Sumunod dito, ang mga naisulat ng propetang Micas (Mateo 2:6, Micas 5:2) ang naging batayan nila upang matunton si Jesus. Sinunod nila ang Salita ng Diyos at natagpuan nila si Jesus. Ang pagsunod sa Salita ng Diyos ay isang paraan upang maipakita natin ang ating pagpuri at pagsamba sa Diyos. Ikwento ang pagkakataong sumunod ka sa Salita ng Diyos. Anong kabutihan ang naidulot nito sa iyong buhay?

- **Binigay nila ang kanilang pinakamahusay kay Jesus.**

*Pagpasok nila sa bahay, nakita nila ang sanggol at ang ina nitong si Maria. Lumuhod sila at sumamba sa sanggol. Inilabas din nila at inihandog sa sanggol ang mga dala nilang ginto, insenso at pabangong mira.*

Mateo 2:11

Alam ng mga dalubhasang ang kanilang pupuntahan ay ang Hari ng mga Judio kaya’t inihanda nila ang pinakamaganda at pinakamainam nilang mga regalo at papuring karapat-dapat para sa isang hari. Sa sarili mong paraan, papaano mo sinasamba ang Hari ng mga hari?

### SO WHAT

*What is the relevance of the Word to my life?*

- Sa pagsamba mo sa Diyos, anu-anong mga alay ang binibigay mo o ano ang iyong ginagawa upang ipakita ang iyong pagsamba?
- Sa iyong palagay, anong kabutihan ang naidudulot sa iyo ng pagsunod mo kay Jesus?
- Papaano mo binibigay ang iyong pinakamahusay sa Diyos?

### NOW WHAT

*How do I apply the Word to my life?*

- Ano ang gagawin mo sa susunod na mga araw upang ipakita ang pagsamba mo sa Diyos? Sa anong bahagi ng iyong buhay ang tingin mo’y kailangang maipakita pang lalo ang pagsamba mo sa Diyos (pananalapi, mga relasyon, trabaho, atbp.)?
- Anong mga utos sa Salita ng Diyos ang sa tingin mo’y gusto ng Diyos na sundin mo sa panahong ito? Ano ang iyong magagawa upang masimulan mong sundin ito?
- Sa anong paraan mo maibibigay ang iyong pinakamahusay sa Diyos sa iyong pag-aaral, trabaho, mga relasyon, o sa pananalapi? Papaano mo mahihikayat ang ibang gawin din ito?